



SAMTING BILONG AMAMAS

Tupela liklik king na kwin bilong singsing i mak bilong ol singsing bilong Nesenel De i kamap long olgeta hap bilong Papua Nu Gini. Dispela de i bin kamap nambawan olgeta bilong olgeta holide bilong yumi. Long olgeta biktaun olgeta seremoni i go gut tru na ol pipel i hepi. Long Popondetta tasol liklik trabel i kamap long apinun.

SAMTING BILONG SORI

Em hia poto bilong bikpela balus Karibu bilong ami i bin lus long Mande, 28 de bilong Ogas, long bus klostu long Wau. Balus i pulap long ol sumatin soldia o kadet i go bek long Port Moresby.

Long dispela ples 25 man i lusim laip. Fopela kadet i wokabaut inap 3-pela de na ol balus i painim ol. Narapela yet i stap long balus tasol bihain em i dai long haus sik.



SMATPELA VOKESANEL SKUL

Lukim pes 8

POTO BILONG OL MEMBA

Lukim pes 12

NIUSPEPA HAITIM DISPELA

Lukim pes 11

STORI : SNEK I LUSIM GRAS

Lukim pes 7

WINIM \$5 DOLA OLGETA TUPELA WIK

Yu gat gutpela ai? Inap long painim mani?
Orait, nau yu lukim las pes bilong dispela
niuspepa na yu ken painim \$5 dola. Olgeta
taim \$5 i hait long dispela pes. YU TRAIM

Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prinin nem bilong yu tru, orait yu raitim wanpela narapela nem bilong yu.

Sela i Wari

Dia Edita.- Mi gat traipela amamas moa long ritim ol kain kain nius i stap long Wantok long ol sampela stori ol man i wok long mekim tingting bilong ol yet long ol kain kain samting bilong kantri bilong yumi yet, na em i gutpela pasin tru.

Hia em i wanpela samting mi yet i gat strongpela ting long ol i mas mekim. Long sampela bikpela taun long Teritori i save i gat pablik telipon long bris na i isi tru long helpim ol sela long go long taun o wanem ples ol i laik i go. Sampela taun nogat pablik telipon long bris em i orait bilong wanem taun i klostu na ol sela i ken wokabaut i go klostu. Na mi gat laik olsem ol i mas putim wan-



Pren, nau i taim bilong autim ol nupela wari na aidia. Raitim planti pas na salim i kam. Moa pipel bai ritim ol tok-tok bilong yu. Yu no ken pret yu rait.

pela pablik telipon long Wewak bris bilong wanem taun i longwe tumas na olgeta taim tarangu ol sela i painim hatwok tru long ringim bas o narapela transpot.

Em tasol Tenkyu tumas
Tony K. Moyaus,
Madang.

Meri No Stap Man i Lus

Dia Edita.- Mi laik bekim pas bilong Michael Kongo bilong Nondugl na Banz. Yes wantok yu tok i no stret long yu long lukim ol meri i sindaun wantaim draiva long ka. Na yu bin tok tu mipela ol meri i save skirap tasol long ol draiva.

Yes wantok, yu min wanem samting tru taim yu yusim dispela hap tok 'skirap'? Mi laik save tru long wanem we mipela meri i save skirap long ol draiva.

Yu ting wanem yu tok-tok long hap bilong yu tasol o long olgeta hap bilong Papua Nu Gini? Wantok yu raun pinis long Bougainville? Sapos yu kam long Bougainville bai yu lukim ol meri. Sapos ol i laik go samwe long ka bai ol i sindaun wantaim draiva.

Ating sapos yu stap long Bougainville bai yu belhat oltaim ya! Mipela ol Bougainville gel taim mipela i sindaun wantaim draiva mipela i no save min long samting. Draiva i mekim meri i sindaun wantaim em long ka bikos em i save, sapos meri i no

stap em i no ken stap.

God em i mekim yumi wankain. Sapos meri i no stap yu no inap stap amamas. God i mekim meri na man long stap amamas, long graun. Mas-ki long rabisim ol meri. Mekim ol olsem yu mekim long yu yet.

Patricia Kangki
Bougainville.

Pati i Pati

Dia Edita.- Yumi lukim long Niuspepa na harim Redio. I gat tupela bikpela pati i pait long toktok long selp gavman. Pangu Pati i hariapim selp gavman, na yunaitet i tok wet liklik. Yumi pipel i tingting wanem? Sampela i tok Pangu Pati em i gutpela na Yunaitet i nogut. Sampela i tok: Yunaitet Pati i gutpela na Pangu Pati i nogut. Tasol mi ting olsem: Pangu Pati em i gutpela na Yunaitet Pati tu em i gutpela. Olsem wanem mi longlong a? Nogat ia. Lukim! Sapos Pangu Pati tasol i wokim gavman yumi bai sampela lo bai gutpela na sampela i no stret. Tasol em i no save long dispela rong o hevi.

Em i gutpela long Yunaitet Pati i sakim dispela na em tok hait long hevi bilong em. Na Pangu Pati lukim dispela hevi, na painim rot bilong helpim dispela hevi bilong mekim kamap orait inap long helpim Teritori bilong yumi kamap strong. Dispela tingting em i gutpela rot tru bilong helpim yumi Papua Nu Gini.

Nau yumi lukim Pangu Pati i sanap na Pipel Progres Pati - na Nesenel Pati - Mataungan Asosiesen tripela i joinim wantaim na yumi

kolim "Koalisen Gavman." Em i gutpela rot tru bilong tingting bilong 4-pela bung wantaim na skelim gut Papua Nu Gini.

"Koalisen Gavman" em i bikpela samting bilong toktok-tingting. Olsem na yumi kristen bilong olgeta sios i stap insait long Papua Nu Gini yumi askim Papa God bilong helpim ol lida bilong yumi long Haus Asembli. Na yumi askim tu long bel isi kamap long olgeta wantaim blesing.

Yu gat wanem tingting laik bekim dispela tok mi laik lukim. Em i tingting bilong mi.

Maga Michael,
T.A.A./Lae.

Rabisman Tru

Dia Edita.- Nau mi laik autim liklik tok bilong mi long yu. Mi lukim wanpela samting olsem, planti man bilong Sauten Hailans ol i save lusim papamama na graun na viles bilong ol. Nau ol i save paul nabaut long taun tasol.

As bilong olgeta dispela trabel i olsem, ol i save les long wokim bikrot. Na ol i les long tromoi takis long gavman. Na dispela kain man bihain tru i kam bek long ples mi ting em bai lus.

I no gat graun bilong wokim haus o gaden o planim kopi samting.

Ating yu wanpela rabisman bilong lusim tingting long olgeta samting long viles bilong yu.

Ol brata sapos yupela ritim dispela pas na wanpela brata i belhat tru, rait long Wantok.

Peter Papu Renali,
Erave/S.H.D.



Wanpela Meri Inap Laka?

Dia Edita.- Mi laik autim wanpela bikpela wari tru long olgeta man bilong Papua Nu Gini.

Mi bin lukim planti man ol i bin maritim pinis namba wan meri, tasol i no longtaim ol i kirap pulim wanpela yangpela meri. Na marit gen inap em i gat tu meri. Sampela ol i marit inap tri o 4-pela meri.

Yu husat man, plis, tisa, woda o kaunsila na ol man bilong ples o bisnis man o P.I.R., mekim olsem, yu olsem wanpela longlong man. Yu no gat save bilong yu. Yu olsem kakaruk, dok o pik. Lukim dispela animal, man ol i save poromanim ol animal meri.

Yu lukim ol Australia i no save maritim tu tu meri. Ol i kam long Papua Nu Gini ol i no tok yupela i ken maritim tupela o tripela meri.

Ol i lukim yumi tasol ol i save tok olsem em i laik bilong yupela. Ol misin i save helpim yumi long marit wan wan meri. Ol i save marimari long yumi.

So ol brata, tingting gut. No ken tingting long ples taun, na mani na planti meri bilong yu na save bilong yu. So em tasol ol brata.

Alois Kurau,
Ambunti.

Baibel i Tok

Dia Edita.- O yes, Aphonse Waliki, mi ritim pinis pas bilong yu long Wantok. Tru tumas planti waitskin long Papua Nu Gini i no bilip long God Papa. Tru tumas ol i save tok bilas long God Papa na bagarapim nem bilong en. Tasol bihain, taim dispela ol waitskin manmeri bai dai pinis, bai ol i kamap long pes bilong God Papa long kot bilong en. Asua bai painim ol. Ol i bagarapim nem bilong Jisas Kraist, tasol bihain God Papa bai bagarapim ol.

Baibel i tok olsem. Yumi no ken harim tok bilong ol. Yumi mas strongim bel na bilip long God Papa na pas long em.

Mi waitskin meri i rait pas long yu, bilong tokim yu, yu no ken pret long tok bilong ol. Ol i mekim planti tok bilas long God Papa. Tasol bihain sori tumas long ol. Bai ol i pinis tasol long han bilong God.

Roselyn Williams
Bunapas/Wewak.

Kago Kal

Dia Edita.- Yes mi laik bekim pas bilong brata hia Gideon Apeng. Long toktok bilong Kago Kal.

Yes brata yu tok long lida bilong olgeta Lotu long Katolik na Luteran na long olgeta Lotu bai ol i mas wok strong long wok bilong painim save bilong helpim kantri. I tru brata dispela tok bilong yu i gutpela tasol mi ting yu rong liklik long dispela.

Samting kago kal i no kamap long man i no gat save tasol nogat i save kamap tu long man i gat save o man i gat bisnis

o wanem kain man, kristen man o haiden man.

Em dispela sik i save kamap nabaut. Mi save long hap bilong mitupela yet long Lae long Morobe Distrik. Dispela sik i save kamap long planti man ihsait long dispela yia tasol.

Long yia 1972 misin na gavman, tupela i wok long stopim dispela sik tasol i no pinis tru yet. Olsem na yu ting wanem we bai yumi ken pinisim dispela wik.

Em tasol liklik tok bilong mi.

Paulus Billy,
Lae.

Salim Bia Long Haus

Dia Wantok.- Planti taim mi save lukim dispela pasin bilong baim bia long ol stua na bihain i go salim gen long haus o long kompaun na ol man i tromoi moa mani gen i go long man i bin baim bia ya na dring. Dispela pasin bilong baim bia long stua na bihain i go salim gen na pulim moa mani bilong ol arapela man mi tingting i no stret.

Kapsaitim Ram, Gin, Meri Buka na ol arapela bia long ai bilong em na givim ol man i dring na pulim mani ya i no gutpela pasin em i pasin nogut tru.

Wanem, yu gat laisens long salim bia long haus bilong yu? Ol kaunsil i mas stapim dispela kain kain pasin na i mas i gat lo.

Tru yu mekim pati na kisim pas long kaunsil ofis samting em i orait. Sapos trabel i kamap bai i go olsem wanem taim ol i dring na bagarapim samting. Sapos yu kisim pas ating bai i no gat planti toktok taim ol man i pait o bagarapim samting.

Sapos dispela tok i kikim bel bilong yu, yu ken raitim pas i go long Wantok.

Keputong Ballang
Boana/Lae

Tisa i Tok Nes i Tok

Dia Edita.- Mi wanpela nes bilong Sunam na nau mi laik autim wari bilong mi na ol wanwok bilong mi.


Oltaim mipela ol nes i save harim long maus bilong ol yangpela man olsem ol tisa. Ol i save tok, ol nes wok bilong ol bilong holim "Bedpan".

Wanem mipela ol nes i save tok "wok bilong yu i bilong holim sok"? Nogat tru! Wok bilong mipela i bilong sevim laip bilong ol pipel na wanem sapos yu gat wanpela sik nogut na yu kam long haus sik bai nes i wok long yu na i holim tu bedpan bilong yu. Mobeta yu tingting pastaim ol poroman, bihain yu toktok. Laka!


Ating yu tisa yu laik maritim nes tasol yu pretim em bikos em i wok long haus sik na olsem yu save tok, wok bilong nes i bilong holim bedpan.

Maski long tok bilas long mipela ol nes, yu ken maritim ol meri hia i no holim wok nes. Na husat brata i gat tok, rait i go long Wantok bai i autim tingting bilong yu tu.

Bernadetta Martin,
Manus Ailan.



RAITIM PAS LONG WANTOK



PLANTI TAUSEN SUMATIN BILONG STANDET 6 I GURIA LONG DISPELA OL MANMERI
 Dispela yia i no gat wanpela waitman i sindaun long komiti bilong wokim ol eksaminesen bilong standet 6. Em hia lain i bin mekim ol sumatin bilong standet 6 i guria tru: (kirap long lephan) Misis Cecilie Backhaus, Mista Keven Raho, Mista Rovoi Levao (eksaminesen ofisa), Mista William Penias, Mista Peter Wama, Mista Galang Awagasi, Mista Geoffrey Malaisa, na Mista Andrew Ivosa.

tisa long indonesia

Ol tisa bilong Indonesia i save kisim pe i narakain tru long pe bilong ol tisa long Papua Nu Gini.

Ol i save kisim inap \$22 long wanpela mun. Ol i kisim 40¢ moa bilong wanpela wanpela pikinini.

Gavman i givim olgeta kaikai na klos long tisa na famili bilong em. Wanpela wanpela man meri pikinini i save kisim 22 paun rais long wanpela mun.

Tisa na famili bilong em tu i no mas baim haus sik na inkam takis.

LULUAI

Long hap bilong Kainantu bilong Isten Hailans i gat 34 luluai na 46 tultul i stap yet long wanem i no gat lokal gavman kaunsil bilong ol pipel yet.

Ol i save putim mak na hat na namba bilong ol olsem bipo tru. Long 1973 bai ol i pinis.

KONSTITUSEN KOMITI

Namba wan minista, Mista Michael Somare, i bin toksave long ol memba bilong Haus Asembli long nem bilong ol man ol i bin makim bilong wokim nupela konstitusen. Em hia nem bilong ol:

Mista Michael Somare - siaman
 Pater John Momis - Bougainville Rijonal
 Dokta John Guise - Alotau Open
 Mista John Kaputin - Rabaul Open
 Mista MacKenzie Daugi - Noten Rijonal
 Mista Matiabe Yuwi - Tari/Komo Open
 Mista Paul Langro - Wes Sepik Rijonal
 Mista Paulus Arek - Ijivitari Open
 Mista Pikah Pikah Kasau - Manus Rijonal
 Mista Sinake Giregire - Daulo Open
 Mista Stanis Toliman - Bogia Open
 Mista Tei Abal - Wabag Open
 Mista Toni Ila - Lae Open
 Mista Angmai Bilas - Madang Open

Ol lain memba hia i bilong ol kain kain politikal pati na distrik bilong kantri.

Na i gat sampela saveman na tisa tu i sambai long dispela lain memba bilong wokim konstitusen bilong skulim ol long ol samting bilong lo i mas stap insait long nupela konstitusen. Profesa J.W Davidson na Dokta D.J. Stone na Mista E. P. Wolfers - tripela i bilong Australia. Em tripela hia Mista Somare i bin makim pinis. Na tupela arapela i redi i stap long wok wantaim: Profesa Y.P. Ghai bilong Yunaitet Nesens na Profesa A. Mazrui bilong kantri Yuganda long Afrika. Mista Seaea Avo- sa bilong Edministresin Koles na Mista John Ley loman bilong Haus Asembli tu i insait long ol.

Gavman Balus

Gavman i ting long statim wanpela lain pasindia balus bilong em yet long Papua Nu Gini.

Ol i ting long larim TAA na Ansett na Qantas i bung wantaim insait long dispela nupela kampani. Bihain tru bai kampani hia i bilong gavman stret. Em i min bai i gat wanpela kampani bilong karim olgeta pasindia long balus.

Dispela ol balus bai i flai insait long Papua Nu Gini na bai i go tu long ol arapela kantri klostu.

Long 1973 bai ol balus i save flai long nait long Papua Nu Gini

SMATPELA BOI

Quinz Bolap, wanpela liklik boi tru bilong Nipa long Sauten Hailans, i bin winim \$145 long wanpela resis long kantri bilong Yurop ol i kolim Italy.

Quinz i bin penim wanpela piksa na i bin winim olgeta arapela skulmanki bilong Yurop.

Liklik boi hia em i bilong standet 2 long Katolik Misin skul long Nipa.

Sevenpela arapela sumatin bilong dispela skul i kisim biknem tu long dispela resis long penim piksa.



Em hia Quinz Bolap i holim setifiket em i bin winim bilong skul bilong em. Tisa bilong em Miss Margaret McNeil bilong Australia i sambai long em.

VICKS

**GUTPELA KAIN MARASIN BILONG
OLGETA MAN MERI NA PIKININI**



Sapos igat kus long hed
o long bros yu mas putim
dispela marasin long nek
na long bros na long bek orait
kus i klia kwiktaim.

VICKS INHALER KOL AIR




Sapos as bilong dispela kus nus
bilong yu i fas yu mas putim
dispela samting insait long nus
na pulim win had tru oriat win
bai kamap klia na kil tru.

VICKS COUGH DROPS



Emi liklik loli i swit tru na i
wok long kliaim nek biling yu long
kus o sapos yu simuk tumas liklik.
Tupela ten loli long wanpela
wanpela bokis isi long putim
long poket.

VICKS COUGH SYRUP



Sapos kus i sitrong
pela tru, dispela
cough syrup bai
halivim kliaim nek
bilong yu.

Dispela samting i
swit mo ol pikinini
bai laikim
dispela tru.

103.3396

KOPRATIF SOSAITI

Moa long 20 yia i go pinis ol pipel long Elevala i bung long mekim wanpela toktok. Ol i laik kirapim wanpela tret stua.


Bihain long dispela toktok, ol i mekim wanpela pablik miting. Ol i tokim ol viles pipel na ol i amamas long helpim ol.

Ol i putim mani na kirapim tret stua long viles. Ol i kolim em Elevala na Tanobada Kopratif Sossiti Trading Ltd.

Na long helpim bilong ol sumatin long Laloki Kopratif Koles ol i bung wantaim long wokim olupela stua i kamap nupela gen.

Olsem na long mun Me Seketeri bilong Dipatmen bilong Bisnis Development, Mista Paulus Matane, i bin opim em.

Em i tok ol pipel bilong dispela Kopratif i no ken lusim mani long narapela stua. Em i olsem ol i memba long dispela Kopratif Sosaiti. Sapos ol i baim ol samting long dispela stua bai stua i ran na ol memba i ken winim gutpela winmani o profit.



Tupela asisten stuakipa Mista Morea Lohia, na Mista Vagi Igo i sanap long dua, bilong kopratif sosaiti stua bilong Elevala na Tanobada.



Insait long dispela kopratif sosaiti stua bilong Elevala Tanobada, yu ken lukim Mista Morea, Lohia i sanap lainim ol samting.

FIKSIM SU

Wanpela nupela woksap bilong fiksim su i bin kirap pinis long Rabaul.



Tupela man bilong Samarai Mista Samuel Ioan na Mista Michael Tom i bin statim bisnis hia long mani bilong tupela yet. Tasol Bisnis Advaiseri Sevis i helpim long givim haus na graun long skruim dispela wok i go het.

Plantil liklik bisnis olsem i stap, tasol ol lokal pipel i gat gutpela save long ranim bisnis i no save yusim save bilong ol na statim bisnis long ol yet.

ofis bilong ol

Kaunsil bilong namba wan gavman i orait pinis long larim ol arapela kantri i ken kirapim ofis bilong ol long dispela kantri. Em hia nem bilong ol kantri. Amreika, Englan, Holan, Japan na Jemani.

Em i tok ol man hia i makim ol arapela kantri i stap insait long Papua Nu Gini bai i helpim kantri i go het wantaim ol arapela kantri long ol gutpela wok. Olsem tu i ken larim ol turis o ol man i kam limlimbur long lukim olkain samting insait long kantri bilong yumi.



stori bilong tumbuna

SNEK I LUSIM GRAS

Bipo tru tru, kapul tupela snek i bin i stap gut tru. Tupela i no save kros. Tupela i pren gut tasol. Tupela i save wok na pilai wantaim.

Wanpela taim nau, bikipela king bilong olgeta abus i bin singautim wanpela bikipela bung bilong olgeta abus bilong kam na harim tok bilong em.

Snek i kirap na i tok, "Pren, ating mitupela i mas bilas na go long harim toktok bilong king bilong yumi. Mitupela i mas katim gras bilong mitupela na bai mitupela bai i luk smat liklik."

Kapul i kirap na i tok, "Pren, yu katim gras bilong mi pastaim. Bihain mi katim bilong yu gen." Snek i strong tumas long kapul bai i katim gras bilong em pastaim.

Orait, kapul i kirap i kisim sisis na resa i stat long katim gras bilong snek. Kapul i no bin mekim gutpela pasin long snek. Em i no larim wanpela gras bilong snek i stap. Em i katim olgeta.


Taim em i katim pinis, em i tok, "Pren, yu lukaut liklik. Yu no ken go klostu tumas long ol meri, bai yu bagarapim tingting bilong ol meri."

Taim snek i go na i lukim em long glas, em i save pinis pren bilong em i bagarapim gras bilong em pinis. Em i belhat nogut tru, tasol i no tok long pren bilong em kapul. Taim kapul i askim em, "Olsem wanem pren, yu lukim yu long glas i o-

rait?" Na snek i tok, "Yes, pren, yu katim gras bilong mi i luk nais tru."

Nau i taim gen bilong snek bilong katim gras bilong kapul. Snek i tok long em yet, "Pren, yu bagarapim gras bilong mi, na bai mi katim gras bilong yu olsem mi tasol."

(Lukim pes 10.)



KOMATSU

KOMATSU'S D85A Crawler Tractor featuring Cummins NH220 Diesel engine at work on the Daulo Pass, Eastern Highlands

the power and strength for Papua New Guinea

Parts and after sales service for KOMATSU Crawler Tractors and Track Loaders is provided by TUTT BRYANT PACIFIC LIMITED throughout Papua New Guinea and The British Solomons. Write for further details on how KOMATSU can help you in Papua New Guinea




Tutu Bryant Pacific Limited

LAE-MADANG-PORT MORESBY-GOROKA-RABAU-LKIETA


KAS I DISPEL



Lain hia bilong pulim umben. Planti sak tu ol i save hukim na kukim.



Sampela yangpela fama i lukautim ol pikinini paul na mekim kamap bikpela.



Hia ol skulboi i lainim pasin bilong fiksik ol moto na motobaik.

Sapos yu lukim baset bilo imaut Yunivesiti long Port ni olsem olgeta 1,700 arape go long Yunivesiti? Wampela

Tarangu, edukesen dipatme mani bilong ol skul em i bo long edukesen, Mista Ebia lukim wampela skul olsem AI

Dispela skul i gutpela ek skul. Gavman i baim tasol p skul. Olgeta arapela samtin i min samting olsem \$50,00 wampela yia. Na ol i mekim

Ol 85 sumatin yet i ranim namba wan banis pik na bani planti sak na yusim long k bilong ol pik na paul. Ol gavman. Ol yet i mas ranim Ol i skul tu long pasin bil Gavman na pipel na kantri




Dispela banis pik i win



Ol boi yet i mas baim na lu

SEPIK NIUS

NESENEL DE LONG WEWAK TAUN



Em hia bikipela lain haiskul meri bilong Yarpas Haiskul. Ol lain i kirap long Garamut Haus Piksa na i wokabaut i kam long nupela Haus Skaut



Lukim gut dispela poto bilong namba wan minis-
ta Michael Somare taim em i stap long Wewak Ne-
senel De. Ating bai ol i laik ol pipel i bihain-
im pasin bilong tupela long pasim laplap na dres



Wanpela lain i win moa long olgeta arapela em
i bilong Moem Praimeri Skul. Ol i pasim laplap
na hat ol i wokim long lip kokonas na ol i gat
siot i gat kala kala na kain kain mak. Hia ol i
sindaun wetim ol haiskul studen i kamap.



Samting olsem 3000 skulboi na skulmeri bilong
ol praimeri na haiskul bilong Is Sepik Distrik i
bung long ples kik na ol i spelim tok PAPUA NEW
GUINEA. Balus i flai antap na ol ripota i kisim
poto bilong samting olsem 8,000 manmeri i bung.

SAPOS YU LAIK BAIM

ka
trak
motobaik
trakta
buldok
masin bilong katim gras

orait, yu kam stret long mipela WEWAK ENGINEERS. Sapos ka bilong yu i bagarap, mipela inap stret-im na penim bai kamap nupela tru. Mipela i win tru long olgeta woksap long Sepik Distrik. Mipela i lapun tru long dispela wok.

WEWAK ENGINEERS



Bringim ka bilong yu i kam long mipela WEWAK ENGINEERS bai wari bilong yu i pinis. Mipela i mekim gutpela wok tru na pe i no antap.

KOS NAMBAWAN TAIM LONG KAIRIRU AILAN

Wanpela trening kos bilong ol 30 meri long Kairiru Ailan i bin stat long 21 Ogas na i pinis long namba wan de bilong Septemba 1972.

Pater Henry Nikel i bin opim dispela kos na Misis Elizabeth Simogun welfe ofisa wantaim wanwok bilong em Mis Florence Baragu i bin ranim dispela kos.

Dispela kos hia i ran i go inap long tupela wik olgeta. Ol meri hia i bin amamas tru long lainim planti olkain nupela pasin bilong kuk lukautim pikinini, samapim samting, na tu olkain nupela pasin bilong pilai samting. Insait long dispela kos long wanpela wanpela de i gat wan wan man i bin

kamap na lukluk long ol meri hia long wanem ol nupela pasin tupela welfe hia i lainim ol meri. Ol i amamas tru long ol dispela ol nupela pasin long skulim ol meri. Ol i ting olsem dispela em i namba wan taim long Kairiru Ailan i gat kain kos olsem i kamap.

Long pinis bilong dispela kos long nait pater Kalizs i bin givim setifiket long ol dispela lain meri.

Dispela setifiket i soim olsem ol meri hia i laikim tru dispela kain ol gutpela pasin na i amamas long bihainim oltaim.

Na ol i givim bikpela tenkyu moa i go long tupela welfe ofisa.

OL MERI PILAI RESIS

Long namba 26 na 27 de bilong mun Ogas, 32 yangpela meri bilong Vanimo taun long Wes Sepik Distrik, ol i bin kam na pilai wantaim ol meri bilong Wewak.

Ol meri hia i bin pilai 3-pela gem long dispela taim. Ol i pilai netbal, sofbal, na basketbal. Long daunbilo yu lukim husat i kisim planti poin, na husat i lus.

NEM BILONG TAUN WANEM TIM WINIM HAMAS POIN

Netbal:

Vanimo.....	namba 1 tim.....	23 poin
Wewak.....	namba 1 tim.....	10 poin
Vanimo.....	namba 2 tim.....	25 poin
Wewak.....	namba 2 tim.....	15 poin
Vanimo.....	namba 3 tim.....	42 poin
Wewak.....	namba 3 tim.....	6 poin

Basketbal:

Vanimo.....	namba 1 tim.....	31 poi
Vanimo.....	namba 1 tim.....	31 poin
Wewak.....	namba 1 tim.....	22 poin
Wewak.....	namba 2 tim.....	33 poin
Vanimo.....	namba 2 tim.....	15 poin
Wewak.....	namba 3 tim.....	25 poin
Vanimo.....	namba 3 tim.....	22 poin

Sofbal:

Vanimo.....	namba 1 tim.....	31 poin
Wewak.....	namba 1 tim.....	15 poin

RAGBI TIM BILONG BIKPELA, MAN

Long daunbilo hia yu ken lukim ol poin bilong ol tim i bin pilai long namba 13 de bilong mun Ogas. Em hia ol poin i kamap olsem.

NEM BILONG TIM WIN LONG HAMAS LUS LONG HAMAS

Manubada.....	17 poin.....	Misin 15 poin
Plis.....	27 poin.....	Ami 17 poin

P.W.D. i no pilai long dispela taim. Ol i bai... Tim bilong S.P. i no moa pilai ragbi nau.....

ol soka tim bilong wewak taun

Long daunbilo hia yu ken lukim ol soka tim bilong Wewak taun. I gat 13 soka tim ol i save pilai insait long Wewak taun.

Long namba 2 na 3 de bilong dispela mun, ol dispela tim ol i pilai na ol skoa, o ol poin ol i kamap olsem:

Sarere

NEM BILONG TIM	WIN LONG HAMAS	LUS LONG HAMAS
Huon.....	2 gol...Kaindi T.T.C.	1 gol
Ami.....	3 gol.....	Lus 1 gol
Kaindi T.T.C.....	2 gol.....	St. Xaviers 0
Brandi.....	3 gol.....	Kunai 2 gol
C.I.B.....	1 gol.....	Wewak Ailan 0
Haiwe.....	1 gol.....	Kalibobo 0

Sande

Kaindi T.T.C.A.....	2 gol.....	Posinu 0
Sepik Yunaitet.....	1 gol.....	Huon 0
I bin gat 4-pela tim ol i bin dro, o ol i kisim wankain poin long dispela taim ol i pilai. Em ol		
Brandi.....	2 gol.....	Sunam 2
Moskito.....	0.....	Wes 0

Yupela papamama tu i
ken painim olkain
marasin.....

Mipela i winim olgeta
stua long Wewak.....

YU STAP GUT
YU ABRASIM OL SIK ...
YU KAM KISIM MARASIN
LONG MIPELA ...

WEWAK PHARMACY



*Em hia ples tru bilong stretim olkain sik
bilong ol pikinini na bebi....*

Mipela i gat olkain susu paura,
kus marasin,
kinin bilong kain kain pen na sik.

Wewak Pharmacy, P.O. Box 172, Wewak,
Ring 862085. (arere long maket bilong Wewak.)

HAISKUL WIN

Wanpela studen bilong
St. Xavier's Haiskul,
Mista Ludwig Nakh i bin
winim prais bilong \$25
dola. Em i kamap namba
wan long wanpela rosi
long raitim kain kain
stori. Em hia nem bi-
long stori em i bin
raitim na i win. Ol i
kolim Pisin Bilong Sora

ISSAC I KISIM MOA KOS

Wanpela Nes man, nem
bilong em, Issac Sali i
bin go pinis long Aus-
tralia long kisim moa
kos long pasin bilong
lukautim haus sik.

Mista Sali i bilong
Is Sepik na i bin wok
long bikpela haus sik
bilong Wewak long Boram.

Ol i tok bai em i
stap long kisim kos bi-

long en long Sydney i-
nap 7-pela mun. Ol i
ting bai em i kam bek
long Teritori long mun
Mas bilong yia 1973.

ami baim takis

Wewak-But Lokal Gav-
man Kaunsil i gat 2-pe-
la nupela wot bilong em
nau. Nem bilong dispela
2-pela wot em Moem Ba-
reks na Moem Peninsula.
Nau bai 2-pela wot hia
i baim takis i go long
dispela kaunsil.

Long yia i go pinis,
ol soldia i stap long
Moem Bareks, klostu
long Wewak, ol i no bin
peim kaunsil takis bi-
long ol i go long We-
wak-But Kaunsil. Ol i
bin tok olsem, ol bai
peim takis i go long
kaunsil bilong ol yet.

Tasol, nau bai ol
soldia bilong 2PIR long
Moem i peim takis i go
long Wewak-But Kaunsil.

Bipo dispela kaunsil
i gat 50 kaunsila ta-
sol. Nau dispela 2 pela
nupela wot i kam in-
sait, na kaunsil hia i
gat 52 kaunsila olgeta
i lukautim 52 wot bi-
long ol.

Tupela wot hia i bin
kam insait long kaunsil
long taim ol i mekim
miting bilong Wewak-
But Lokal Gavman Kaun-
sil long namba 14 de
bilong dispela mun yet.

Long taim bilong mi-
ting, namba wan kiap
bilong Is Sepik Distrik
Mista Edward Hicks i
tokim namba wan bilong
Ami olsem. I gat planti
ol gutpela saveman i
stap insait long Ami.
Sapos ol soldia i laik-
im sampela helpim, bai
kaunsil i helpim ol.

wewak naitskul program

DE	MUN	TAIM	WANEM SAMTING	WANEM PLES
19	Septemba.	(7-9)	-Pasin Samap....	Boram Skul Nes
20	Septemba.	(5-6:30)	-Fiksim Baik....	St. Francis
20	Septemba.	(7-9)	- Ret Kros.....	Boram Skul Nes
21	Septemba.	(5-6)	- Lo bilong Bisnis..	St. Francis
21	Septemba.	(7-9)	- Pasin Bisnis..	Boram Skul Nes
21	Septemba.	(10-12)	- Haijin.....	St. Francis
21	Septemba.	(7-30-8:30)	- Kaunsil...	Haus Kaunsil
25	Septemba.	(5-6:30)	- Wasim ol Poto..	Wirui Press
25	Septemba.	(5-6:30)	- Inglis...Pramer	'A'Skul
3	Oktoba....	(8-9:30)	- Tok Pisin.....	St. Francis



SEDEN MOTORS

AGENTS FOR MASSEY FERGUSON, *

YAMAHA MOTORCYCLES,

TOYOTA VEHICLES.....


SEDEN MOTORS for your batteries, repair work
and steam cleaning



MANI BILONG YU INAP KARIM PIKININI



BIHAIN LONG
WANPELA YIA,
DISPELA WAN
HANDET DOLA
I KARIM PIKININI:
EM I KARIM
SIKIS DOLA...
OLGETA YIA
EM I KARIM
6 DOLA MOA



SAPOS YU GAT MANI NA
YU LAIK EM I KARIM
PIKININI ORAIT YU GO
TOKTOK WANTAIM LONG
WIRUI STUA LONG WEWAK
OYU SALIM PAS LONG
WIRUI STUA, P.O. BOX 107
WEWAK.
OL I NO KEN KISIM
LIKLIK HAP MANI. NOGAT.
OL I STAT LONG KISIM
\$100 DOLA....



Mista Matias Yaliwan

Matias Yaliwan, Memba
bilong Haus Asembli bi-
long Yangoru-Saussia, i
bin mekim toksave long
ol man long hap bilong
em olsem: Mi Matias mi
no laikim tru Peli Aso-
siesen na wok bilong
en.

Matias i tok Daniel i
bin trikim ol man na i
bin kisim mani bilong
ol. Tasol dispela mani i
no ken karim narapela
mani nating. Nogat. Em
i giaman bilong Daniel
tasol, Matias i tok.

Gavman i no ken kisim
dispela mani long wanem
em i bilong olgeta pi-

pel na Daniel i mas
bekim bek long ol.

Matias i tok: yu laik
winim mani na go het, yu
mas wok. Em tasol.

Daniel Hawina na 5-
pela arapela memba bi-
long Peli Asosiesen i
stap nau long kalabus
bilong Boram inap 5 mun
olgeta. Ol i bin spak
na pait wantaim ol plis
long Maprik.

Nau planti memba bi-
long Peli i wari long
ol mani Daniel bipo i
bosim.

nesenel de

Long Septemba namba
11 de long Papua Nu Gi-
ni em i Nesenel De.

Long olgeta yia Nese-
nel De i save kamap
long kantri bilong yumi
long dispela de tasol.

Long Wewak, planti
tausen pipel i kam na
lukim ol samting i kam-
ap long Nesenel De.

Long apinun, 4-pela
lain pipel i singsing.

MI LAIKIM

WEWAK CORDIALS

Jusfrute



Long wanem ? EM I SWIT MOA

SAPOS YU LAIK BAIM GUTPELA MULIWARA.....ORAIT.
"ORCHY" MULIWARA I STAP.....

Yu ken baim planti lemanet long Wewak Cordials
Orange, Sarsparilla, Lemon, Pineapple, Mandarin
Raspberry, Lemonade, Grapefruit, Cola, Lime...na
planti moa i stap long ol stua long hap bilong
yumi.

BILONG A SKUL

g dispela yia, bai yu pain-
presby i bin kisim moa ma-
a skul wantaim. Na husat i
sumatin long olgeta 1000.


i hatwok tru long painim
im. Olsem em na minista bi-
lewale, i amamas tru long
APE VOKESANEL SENTA.

ampel tru long olgeta kain
bilong 4-pela tisa bilong
ol sumatin yet i winim. Em
(fifti tausen dola) long
lsem wanem?

3-pela tret stua. Ol i gat
kakaruk. Ol i save hukim
ikai bilong ol manmeri na
save mekim wok kamda long
l masin na fiks na baim.
ig umbenim pis.
i laikim kain skul olsem.



Kain sak olsem ol i save brukbrukim na givim long ol pik na ol pãul.




ong Mes Sepik Distrik.



Man i mas save wokim haus long ol samting bilong bus tu, olsem limbum.



autim ol trakta na masin.



Ol boi yet i wokim dispela kain haus. Ol i no skul long buk tasol.

SNEK I LUSIM GRAS (stori i go moa)

Snek nau i kisim sis na resa gen na i stat long katim gras bilong kapul. Em i stat pastaim long tel, na i kam namel long tel na taur i krai bilong singautim olgeta abus long go klostu long bung. Na snek i tok, "Pren, mi no pinisim yet gras. Olsem wanem? Bai mitupela i go long bung pastaim, bihain long miting bai mi pinis katim gras bilong yu?"

Taim tupela i go kamap long bung, olgeta abus i lap nogut tru long tupela long gras bilong snek i pinis olgeta, na bilong kapul long tel, tasol. Olsem na yu ken lukim kapul na snek tupela i gat sem namel long tupela. Sapos kapul i lukim snek bai em i go hait. Na snek i lukim kapul bai i ranawe.

Bipo, snek i bin gat gras long en, nau i no gat moa gras. Olsem tu long kapul i wankain long tel bilong em. Bipo gras i karamapim tel bilong em, tasol nau tel bilong em i no gat gras.

By Stephen Gai

planti kaikai

Long yia i go pinis ol pipel bilong Isten Hailans klostu long Goroka i bin bringim samting olsem 3,894 tan sayor na kaikai bilong ol gaden i kam long ol maket na i go tu long ol taun long nambis.

Ol i bringim kaukau na poteto na kasang na ol kain kain sayor.

Long dispela yia tasol bai i gat trabel long wanem graun i sot long ren.

Long poto long rait-han yu ken lukim wanpela sevis plisman bilong ples Eaura, nem bilong em Mista Beniga Waiga.

Tupela bikpela man i gutbai long em. Long lephan yu lukim man i pasim waitpela laplap, em Mista Philip Taunakeke, presiden bilong Rigo Lokal Gavman Kaunsil. Long raithan em i Minista bilong Lokal Gavman, Mista Boyamo Sali.

Mista Waiga i kisim medal bilong 30 yia wok



NAMBA WAN TIM LONG TERITORI

Long gutpela tim olgeta man i mas bung na wok wantaim.



Wanpela wanpela i mas save gut long wok bilong poroman bilong em. Dispela em i pasin tru bilong Ansett Airlines bilong Papua New Guinea.

Yu ken pilim: mipela olgeta manmeri bilong Ansett, mipela i bung wantaim, i wok wantaim.

Yu kam long ofis na yu laik baим tiket.

Wantu, yu ken lukim mipela i gat planti saveman moa. Man o meri i raitim tiket bilong yu, man i makim ples bilong yu long balus, man i kisim kago bilong yu, mekanik i redim balus, ol kagoboi bilong balus, ol boskru bilong balus, kepten bilong balus - olgeta manmeri hia ol i save moa long wok bilong ol stret. Ol i olsem wanpela tim tru. Ol i win moa.

Tru tumas: ol i namba wan tim long dispela Teritori.



ANSETT

AIRLINES OF PAPUA NEW GUINEA

in conjunction with ANSETT AIRLINES OF AUSTRALIA

2131/154

WINIM KONTRAK

Wanpela kontrak bi-long Pablik Wok i kos long \$940.000 long wok-im ol tang bilong holim wara long Madang.

Mista Ewa Basananuc i winim dispela kontrak. Em i kam long Uluo vi-les long Finschhafen. Em i bin lainim wok hia long Lutheran Misin pas-taim long statim bisnis bilong em long yia 1971.

Em i kolim dispela bisnis Alltank Indas-tri. Em tu i mekim bis-nis bilong em i ran moa long wokim wankain wok long banisim wara in-sait long ples.

WATPO OL NIUSPEPA I HAITIM TOK ??

Long mun Ogas taun kaunsil bilong Lae i bin putim wanpela nupela lo na ol rabisman insait long taun i bin amamas tru long en.

Taun Kaunsil hia i bin rausim olgeta het takis. Ol i bin putim takis antap long ol hap graun.

I olsem: man i gat graun, em i mas baim takis inap long prais bilong graun bilong em. Man i no gat graun, em i no mas baim takis.

Inap nau ol man i gat bikpela mani na man i

no gat wok, ol i wanmak tasol long takis. Ol i pilim em i no stret.

Lae Taun Kaunsil i putim 25¢ takis tasol long ol skwata. Olsem bai ol i winim \$392 in-sait long wanpela yia. Tasol long ol bisnisman bai ol kisim \$130,000.

Kaunsil bai i ranim kain kain wok olsem wok mumut, helt senta, ol ples pilai na ol rot. Olsem em i mas gat man bilong baim wokman.

Em i ting long putim liklik takis long ol ples pilai, long go



Mista Ewa Basananuc i sanap namel wantaim tupe-la wokman bilong em. Ol i save tumas long wokim ol tang bilong holim wara. Em hia yu lukim ol i wok long wokim wanpela tang wara.

long piksa na singsing na kain samting olsem.

Dispela nupela pasin bilong kisim takis i bin mekim trabel long ol lokal gavman kaunsil i stap nabaut long bus. Ol i no gat bisnisman.

Na narapela samting tu, ol manmeri i laik ranawe i go long Lae nau, long wanem ol i no gat bikpela takis.

Sapos ol arapela taun i harim dispela smatpe-la lo bilong Lae, ating bai ol i bihainim tu.

YU LAIK TISA ?

I gat ples inap 1000 skul manmeri long 10-pela tisa koles, em long yia 1973.

Bai i gat 9-pela koles bilong trenim ol praimer i tisa na wanpe-la koles tasol bilong trenim ol sekondari tisa.

Dispela las tingting bilong kisim ol tisa i kam long ol koles yet.

Inap long Oktoba 31 de bilong dispela yia bai i klos na i no inap kisim moa aplikesen.

skulanka

OLGETA SUMATIN BILONG

STANDET 6 I MAS RITIM

DISPELA NIUS.

Minista bilong olgeta skul, Mista Ebia Olewa-le i tok bai i gat sampela senis bai kamap long lo bilong praimer i skul long 1973.

Em i tok, dispela se-nis i ken mekim sampela skulmanki i bin pinisim standet 6 bai i ken skul tupela yia moa, sapos ol i no bin makim ol long i go long hai-skul.

Em i tok ol dispela skulmanki i stap insait long praimer i skul yet tasol bai ol i kolim dispela skul olsem



MISTA EBIA OLEWALE

Skulanka. Em i tok, skul hia i antap long praimer i skul, tasol i aninit long haikul.

Olsem tasol dispela kain skul bai skulim ol manki long fom 1, fom 2 na tu long ol arapela samting.

Em i tok tu olsem ol sumatin i ken stap long dispela kain skul long tupela yia tasol.

Em i tok inap olsem 35 manki bai i stap long wanpela wanpela skulanka. Na tu bai wan wan praimer i skul long olgeta distrik bai i gat dispela kain skul.

Olgeta distrik eduke-sen bot bai salim nem bilong skul ol i ting i gutpela long mekim skulanka.


Territory Battery Suppliers



for a full range of batteries including motorbike batteries for Honda, Suzuki, Yamaha.....

P.O. Box 188, LAE.
Ph. 42929.

SAVE LONG OL MEMBA



MISTA MARCUS KAWO
(Usino-Bundi Open)

AS PLES. Barim
OL KRISMAS. 25
LOTU Luteran.
SKUL. Bongu, Baitabag, Goroka Haiskul na Lae Tisa Koles.
WOK. Em i baibel skul tisa inap 4-pela yia.



MISTA TEI ABAL
(Wabag Open)


AS PLES. Wabag
OL KRISMAS. 40
SKUL. Medikol odeli skul long Wabag.
WOK. Medikol, Memba bilong Haus long 1967 na i seketeri bilong ol wok. Bihain em i minista bilong didiman na memba long kaunsil bilong namba wan gavman. Em i siaman bilong Yunaitet Pati na presiden bilong klap bilong ol lokal pipel long Wabag.
LUKIM PINIS. Em i bin go long Australia na sam-pela arapela kantri pinis.

WANTOK - Trinde, 20 Septemba, 1972 - Pes 12




MISTA ANSKAR KARMEI
(Apa Sepik Open)

AS PLES. Ambunti
OL KRISMAS. 40
SKUL. Winim stendet 4
WOK. Boskru long sip, wok long hausmit long Rabaul, kepten long sip, stua kipa na bosboi. Em i kaunsila na presiden bilong Ambunti Kaunsil na siaman bilong komiti bilong lukautim mani.
FAMILI. Em i marit na i gat 5 pela pikinini.



MISTA KAIBELT DIRIA
(Wahgi Open)

AS PLES. Minj
OL KRISMAS. 44
WOK Em i wanpela hetman, fama, presiden bilong Nancamp Kaunsil na tu presiden long Wahgi Kaunsil. Em i bin memba bilong Haus long 1964 inap nau.
FAMILI. Em i marit na i gat 4-pela meri na 3-pela pikinini.



BOUGAINVILLE MARU


Lukim dispela bikpela sip ol i kolim'Bougainville Maru'. Sip hia i bilong ol Japan. Ol i bin wokim em yet long woksap bilong wokim sip ol i kolim Koyo Dockyards long Japan yet.

Dispela sip ol i wokim bilong karim kopa long Panguna long Bougainville Distrik na i save bringim i go bek

gen long Japan.

Bougainville Maru i save karim moa long 20,000 tan kopa.

Longpela bilong Bougainville Maru i winim wanpela pilai graun bilong soka, na olsem wanpela hap namel bilong em inap long pilai sapos sip hia i bilong pilai. Tasol no gat ya. Sip bilong karim kopa.



komuniti wok

Long tupela mun bipo mipela ol YC i ripot long ol sampela wok mipela ol YC lida i laik lukim i kamap long olgeta klap bilong YC. Mipela toksave long olgeta klap bai ol i mas wok hat long helpim ol manmeri long komuniti bilong ol. Mipela i tok pinis na wanpela ripot i kam long ofis bilong mipela na mipela i laik autim dispela ripot long Wantok. Sapos sampela klap i lukim dispela ripot orait ol i ken tingting long kirapim dispela kain wok long klap bilong ol.

Long las mun ol YC

long Lae i wokim wanpela bikpela miting long YC ol i kolim'Semina'na ol i singautim ol hetman long Lae bai i kam toksave long ol memba long ol sampela trabel i kamap long taun na planti man i no gat haus na i no inap painim wanpela haus, maski man i gat mani o nogat.

Ol sampela hetman bilong kaunsil na gavman i kam na bekim sampela kwesten bilong ol memba na ol memba i klia pinis long ol dispela trabel. Ol i klia pinis long as bilong trabel na taim miting i pinis ol i wokim wanpela resolusen o ripot na salim i go long kaunsil, Distrik Ofis, Welfe, na Edukesen Ofis.

Mipela i laik autim 4-pela resolusen bilong ol:

1. Leba Ofis i mas kirapim sampela tim kamda bai ol i ken go na wokim haus bilong ol dispela man i no gat haus.

WANEM TRIK ?

Sampela man bilong Hailans i ting ol man bilong nambis i trikim ol, long wanem ol i save kisim 10¢ samting long kopi bilong ol na ol i rit long niuspepa olsem wanem ol nambisman i salim kopi long 35¢. Ol i ting ol nambis i giamanim ol.

Tasol nogat tru. Ol man i gat diwai kopi ol i gat wanpela wok tasol long bungim na mekim drai kopi.

Tasol em i kostim manni long karim kopi i go long trak. Orait, kamap pinis, nau kopi i save go insait long ol bikpela tang bilong mekim drai tru tru.

Pinis, nau ol i rausim skin bilong kopi.

Narapela masin gen i bungim olgeta liklik bin kopi na ol bikpela liklik na ol bi

tru i go long hap bilong ol stret.

Las tru wanpela masin i save glasim kala bilong ol bin na rausim ol bin nogut.

Nau tasol ol inap pulimapim long ol bek bilong salim i go long ol kantri olsem Australia, Jemani, Amerika, Hong Kong, Englan, na Frans.

Olsem nau yu lukim bilong wanem prais bilong kopi i narakain long Hailans na narakain long Lae.

PLAK ANTAP

Long Nesenel De wanpela lain 38 man i bin goapim bikpela maunten tru bilong Papua Nu Gini, em Maun Wilhelm.

Het bilong em i stap 14,793 fit antap long solwara.

Mista Iambakey Okuk, presiden bilong Wilhelm Kaunsil i bosim ol.

Kain tim olsem i ken wokim haus kwik na pe bilong haus tu i no go antap tumas, bikos ol tim i wok long dispela samting tasol. I no gat narapela kain wok.

2. Welfe ofis i mas kam klostu long ol skwata, ol mas go sindaun long ples skwata, harim tok bilong ol man, kisim hevi bilong ol na go bek long ofis na wokim sampela nupela we long helpim ol.

3. Planti manki i no gat skul moa. Mipela i wari tru long ol dispela standet 6 skul liva. Edukesen i tok, i no gat tisa long skulim ol. Orait mobeta yumi kisim ol dispela Fom 4 studen na askim ol long helpim ol manki long fri taim bilong ol. Ol i ken mekim sampela skul, helpim ol long save long we bilong bisnis na wokim klap bilong ol dispela skul liva.

Sapos ol skul liva i

stap long aut stesin i no gat tisa long helpim ol long wari bilong ol, orait, Edukesen i mas askim sampela tisa i stap klostu long aut stesin long helpim ol dispela lain manki long kisim save moa.

OL I WIN LONG TOK PISIN

Long 16 Septemba, em pestode bilong ol man i save raitim buk na nius na stori, ol i givim prais long 3-pela man i rait long tok pisin.

Ludwig Nakh bilong St Xavier Haiskul long Kairiru Ailan (Wewak) i winim \$25. Paptaba Moses bilong Dental Koles long Port Moresby i bin winim \$15. Na Joseph Bulie Minji bilong Teknikal Koles long Port Moresby i winim \$10.

Ol jas i tok Peter Masi bilong Kairiru em tu i bin raitim wanpela gutpela poem.

SWIT MOA!




Dispela marasin bilong klinim tis, ol i kolim long "COLGATE". Smel bilong em i swit moa yet. COLGATE i nap long rausim ol liklik pipia bilong kaikai i pas long tis bilong yu. I klinim tu retpela pipia bilong buai long tis.

Sopos yu usim COLGATE bilong klinim tis bilong yu long olgeta dei, bai tis bilong yu i stap klin oltaim.

Yu nap painim dispela marasin COLGATE bilong klinim tis long planti stua long hap yu stap. Em i gutpela marasin tru bilong lukautim oltaim tis bilong yu.

Sopos yu go long stua yu askim long COLGATE marasin bilong klinim tis.

kaunsil nius



Dispela piksa i soim maket bilong Mt. Hagen Lokal Gavman Kaunsil. Long daunbilo hia yu ken lukim tupela man i wok long bulldosa stretim graun long mekim dispela maket i kamap bikpela.

Stat long bipo i kam inap nau, ol pipel i stap klostu long Mt. Hagen. Save go bung long dispela liklik maket i kamap long piksa hia, na salim ol samting bilong ol. Tasol nau ol pipel i surikim arapela hapgen bilong mekim dispela maket i bikpela. Ba planti pipel i kam salim samting bilong ol.

Kaunsil i ting olsem bai dispela maket i kostim \$5,000 dola. Taim ol pipel i pinisim olgeta wok bilong dispela maket, bai Mt. Hagen Lokal Gavman Kaunsil i gat bikpela maket tru.

Hostel i Win Tru

Minogere Hostel bilong Goroka Lokal Gavman Kaunsil insait long Isten Hailans Distrik, i kamapim pinis moa long \$47,000 dola win mani bilong em.

Kaunsil hia i kisim \$60,000 dola dinau long Papua Nu Gini development Beng na \$20,000 dola long Komonwelt Beng.

Kaunsil i putim \$19,000 dola long baim dispela hostel.

Ol kaunsila i ting olsem bai kaunsil bilong ol i bekim olgeta dinau mani long yia bihain.

Dispela kain bisnis em i wanpela gutpela bisnis tru sapos wanpela lokal gavman kaunsil insait long Papua Nu Gini i ken ranim.

Helpim ol Skwata

Long sampela taim i go pinis, ol kaunsila bilong Madang Taun Kaunsil wantaim ol sampela sumatin bilong Para-Medikal Koles long Madang, ol i wokim 5-pela pam wara long ol skwata insait long Madang taun.

Bipo ol pipel i save

KLASIFAIT

PABLIK NOTIS

WINIM HANWAS. Ritim 1 Korin sapta 15 na raitim stori inap long 500 wot (words) long "kirap bek". Stori i mas kamap bipo long 30 Novemba 1971. Adres: Booklet Box 1096, Boroko.

dringim wara nogut na ol i kisim sik oltaim. Na tu sampela taim ol i save wet longpela taim tru long kisim wara. Nau olgeta pipel i stap insait long ol dispela skwata, ol i yusim gutpela wara tasol.

Klos Tumbuna

Orimo-Bituri Lokal Gavman Kaunsil wantaim Kiwai Lokal Gavman Kaunsil long Westen Distrik, i laikim ol presiden bilong olgeta lokal gavman kaunsil long hap bilong ol long werim ol hat em ol wokim long gras bilong ol kumul long taim bilong kaunsil miting.

Ol kaunsila bilong Kiwai lokal gavman kaunsil i laikim kaunsil presiden bilong ol i mas werim siot ol i wokim long skin bilong sikau.

Kiwai lokal gavman kaunsil i laikim ol yangpela pipel bilong distrik bilong em ol i mas bihainim ol pasin

bilong tumbuna bilong bipo tru.

Brik Karanas

Long Milne Bay Distrik, ol kaunsila bilong Kiriwina Lokal Gavman Kaunsil, ol i wokim brik long karanas na rif. Ol i kisim ol dispela karanas na rif klostu long ol nambis bilong solwara.

I kam inap nau, ol leba lain, o ol wokman bilong kaunsil, ol i wokim pinis 1,800 brik olgeta. Na olgeta wantaim ol i strong tru long wokim ol haus.



'READ'

THE LITERACY AND LITERATURE MAGAZINE

- Published Quarterly
- Subscription \$1 yearly

The Editor, Box 43,
P.O., Ukarumpa, E.H.D.

Wantok Publications bilong Wewak (P.O.Box 298) i wokim, na Wirui Pres long Wewak i prinim.

KRISTEN PRES i wokim kain kain buk bilong strongim bilip na bilong sanapim gutpela pasin na sindaun na bel isi bilong ol manmeri na ol pikinini.

Nau yu ken baim 4-pela "Arch Book" long tok Pisin:

**Pis I Kisim Jona
God I Helpim Daniel
Haus Antap Long Ston
King Em I Singaut**

4-pela Baibel stori bilong ol pikinini.
Ol papamama i laikim ol tu.

Salim oda i go long:



KRISTEN PRES

Sales Division
The Christian Book Centre
Box 222, Madang

PAINIM 5 DOLA HIA

OL LO BILONG WIN

Painim wanem samting i hait insait long piksa. *Pastaim yu ritim tok aninit long piksa bilong painimaut wanem samting i hait na yu mas painim. Bilong painim yu mas tanim tanim piksa nabaut.*

2.

Kisim pensil na raunim dispela samting yu bin painim long piksa, bai mipela i ken lukim yu bin painim o nogat.

Nau salim piksa i kam long dispela adres:
PIKSA
BOX 396
WEWAK

4.

Hariap Mipela i mas kisim bek piksa insait long wan mun. *Mun i, stat long de yu lukim daunbilo long olgeta pes bilong dispela niuspepa.*

5.

Pepa bilong olgeta manmeri i givim stretpela tokbek bai i go insait long wanpela basket. Bihain wanpela pikinini i pulim wanpela piksa i kam antap. Sapos em i bilong yu, yu winim 5 dola (\$ 5.00)

6.

EM TASOL - YU TRAIM, EM I ISI MOA.



LONG DISPELA PIKSA YU LUKIM TUPELA BIKPELA
PISIN I KIRAP FLAI. TASOL PIKININI BILONG
TUPELA I PRET NA EM I HAIT I STAP. YU INAP
PAINIM EM?

Sapos yu painim, orait, yu raunim em
long pensil bai mipela tu i ken lukim.

Sapos yu wanpela yu laik kisim WANTOK i kam
long yu stret, orait yu salim dispela tiket
i kam:

Mi laik kisim WANTOK niuspepa inap wan yia
olgeta. Nau mi salim \$4 (foa dola) i kam;

Nem:

Adres:

.....

Salim i kam long :

WANTOK - P.O. BOX 298 - WEWAK

Sapos yu stap long skul o long kaunsil o long
wanpela klap, mobeta yupela kisim planti
WANTOK i kam olgeta taim. Sapos yupela kisim
10-pela o moa, bai prais i daun tru. Yu rait
na askim mipela tasol.

Hia nau yu raitim :

Nem:

Adres :

.....

Mi laikim pepa i kam olgeta taim

Salim i kam long :

WANTOK - P.O. BOX 298 - WEWAK